

gusta karno iom simila la bovidan viandon (*thynnus*).

Tindro. Spongeca, tre brulema substanco, devenanta de iuj fungoj.

* **Tineo.** Malgranda papilio, kies larvoj mangas lanon, ŝtofojn, peltojn (*tinea*).

Tinko. Bongusta riverfiŝo samfamilia kiel la karpio (*linca*).

Tinkuro. 1 Fluaĵa substanco por kolorigi teksaĵojn aŭ fadenojn per ensorbado. 2 ☞ ☞ Solvaĵo de iu substanco en alkoholo. ~isto. Homo, kies metio estas kolorigi aŭ senmakuligi teksaĵojn. ~i (tr). Kolorigi per ~o.

* **Tinti** (ntr). 1 Interfrapiĝante eligi sekan sonon: la amboso ~ante resonigis per la pezaj marteloj de la forĝistoj; la glavo k armaĵoj krak~is Z; ~igi glasojn, monerojn; tia malbeno, ke ĉe ĉiu, kiu tion aŭdis, ek~os en ambaŭ liaj oreloj Z; ĉirkaŭita de granda sekantaro, kun bruo k ~o la faraono eniris en la salondon B; aŭdigis ~ado de armiloj, huŝo~ado de ĉevalo. 2 (f) Mallerte ludu muzikilon: ŝi povas iom ~i sur fortepiano Z; ili ~as sur psalteroj, pensante, ke ili estas muzikistoj egalaj al David Z. ~ilo. Malplena metala sfereto entenanta metalan buleton, kiu per skuigo estigas sonon.

* **Tio.** Montra pronomo signifanta « io, kion mi nun vidas antaŭ mi aŭ pri kio mi nun parolas; tiu afero, tiu aĵo, tiu objekto, tiu ideo »: ~ estas tre facila; de kio ~ venas Z? kion ~ signifas? ekzistas personoj, kiuj ~n ne komprenas Z; ~ ĉi estas la ĉefa celo de niaj kongresoj Z; li ne similas al ~, kio li antaŭe estis Z; ~, kion vi diras, estas tre grava; ŝi rakontis ~n, kio okazis al ŝi Z; ~ ĉi estis feino Z; ĉu ~ estas vi, Ivan Z? ~ estas tute mia opinio; ~ estas hundoj, kiuj bojas; ~ estas ili, kiuj parolis al faraono Z; ~ estas tiuj fremduloj, kiujn ni atendis; ~ estis la vortoj, per kiuj li finis; (~ĉi) estis la unua fojo Z; kion vi promesis, ~n plenumu Z; mi volis atentigi vin pri ~, ke en nia afero ĉio povas esti atingita nur per harmonio k konstanteco Z; la esp-ismo celas nur al ~, ke ia tago k vivipova komprenilo inter la popoloj ekzistu Z; la danĝero de ilia atako konsistis en ~, ke ĝi estis kaŝite preparita Z; la dua kulpiĝo, kiun ni ofte devas aŭdi,

estas ~, ke ni estas malbonaj patriotoj Z; ni memoru pri ~, ke niaj kongresoj estas antaŭparolo por la historio de la estonta interfratigita homaro Z; ĉio dependas de ~, kiel oni konsideras la aferon; konforme al ~, kiel mi ordonis al vi Z. Kp KIO 3, ĉi. Vd ESTI 3.

* **Tiom.** Montra adv. rilata al nedefinita, sed plej ofte, en praktiko, al granda kvanto, k: 1 signifanta « tia kvanto, tia nombro »: ili prenis sur sin malfacilan taskon ĵuste, kiam ekzistis ~ da malhelpoj Z; mi ne pensis, ke ~ da homoj pereis; la lipoj, kiujn mi kisadis ~ ofte Z; ~ pli bone Z; ~ multe da laboroj k suferoj Z; ~ (~ multaj) estis la jaroj de la vivo de Sara Z; ~ malfeliĉoj Z. 2 montranta korelativon: verŝu al mi ~ da akvo, kiom da vino; la patro donis al ni ~ da piroj, kiom da pomoj; mi havas ~ da libroj, kiom (aŭ: kiel) vi; Konfuceismo estas ne ~ religio, kiom filozofio; li havas ~ da kapablo, kiel mi Z; helpu al li ~, kiom vi povos; lasu lin demandi ~, kiom li deziras Z; mi povas diri almenaŭ ~, kiom mi ĝin aŭdis Z; mi prenas kiel alestantojn vin ĉiujn ~, kiom vi estas Z; kiom da kapoj, ~ da opinioj Z; ĝi plaĉas al mi ~ same, kiel se miaj versoj estus elkriataj de publika anoncista Z. 3 montranta sekvon de kvanto: estis ~ da homoj en la salono, ke ni apenaŭ povis moviĝi; li drinkis ~, ke li ebriiĝis; tio estas ~ pli grava, ĉar li estas konata de ĉiuj; ~ (des) pli bone por ni Z. Kp KIOM, TIEL. ~aj, ~ multaj. Tiel multaj.

Tip. 1 Ideala modelo prezentanta altgrade en si la karakterizajn ecojn de iu speco da personoj aŭ objektoj: li estas vera ~o de honestulo; li havas la japanan ~on; la plej perfekta ~o de plena k riĉa lingvo Z. 2 Modela peco laŭ kiu oni fabrikas similajn pecojn: la diversaj liter~oj de presarto. Kp ŜABLONO, NORMO. ~a. Konforma al la ~o: la ~aj ecoj de la Angloj; vizaĝo ~e hebrea.

Tipografio. Presarto.

tipometro (Ti). Linilo kun skalo por mezuri la tipografiajn punktojn, uzata ĉe la kompostado.

* **Tiri** (tr). 1 Movi ion aŭ iun al si kun pli malpli granda peno, ne ŝangante sian lokon: ~i ŝnuron; ~i inĵanon per la mano; fiŝo ne iras, sed hoko ĝin ~as Z;